

Forskrift om tilskot gjennom Regionalt miljøprogram, Møre og Romsdal

Heimel: Fastsett av Fylkesmannen i Møre og Romsdal 12. juni 2013 med heimel i lov 12. mai 1995 nr. 23 om jord (jordlova) § 18 og delegeringsvedtak 14. desember 2004 nr. 1615.

Kapittel I. Generelle føresegner

§ 1. Føremål

Føremålet med tilskotsordningane er å medverke til eit aktivt og bærekraftig jordbruk, ivareta kulturlandskapet og redusere forureininga frå jordbruket.

§ 2. Virkeområde

Forskrifta gjeld for tiltak i Møre og Romsdal.

§ 3. Grunnvilkår

Tilskot kan gjevast til føretak som har rett til produksjonstilskot¹ i jordbruket og har miljøplan trinn 1².

Tilskot kan òg gjevast til beitelag godkjente av kommunen og registrert i Einingsregisteret.

§ 4. Tilskotssatsar m.m.

Tilskot kan gjevast etter utfyllande retningslinjer, satsar, soner og definisjonar, m.m. fastsett av Fylkesmannen i Møre og Romsdal.

§ 5. Søknad og utbetaling

Søknad skal leverast på eige skjema, fastsett av Fylkesmannen i Møre og Romsdal, og innan søknadsfrist fastsett av Fylkesmannen i Møre og Romsdal. Søknader som blir levert etter fristen, vil få berekna ein reduksjon i tilskotet på kroner 1000 for kvar virkedag rekna frå fristen. Søknader som vert levert meir enn 20 dagar etter søknadsfristen, skal avvistast.

Berekna tilskot under 500 kroner blir ikkje utbetalt.

Løyvd tilskot vert utbetalt til det føretaket som søkte. Tilskotet kan ikkje overdragast til eige eller pant.

Kapittel II. Tilskotsordningane

§ 6. Tilskot til slått og beiting av lokalt viktige jordbrukslandskap

Tilskot kan gjevast til føretak som driv jordbruksareal innafør nærare avgrensa soner med særleg verdifullt kulturlandskap.

§ 7. Tilskot til skjøtsel av bratt areal

Tilskot kan gjevast til føretak som driv minimum 10 daa fulldyrka eller overflatedyrka jord med ei helling på 1:5 eller brattare. Arealet må haustast ved slått.

¹ Jf. forskrift av 22. mars 2002 om produksjonstilskudd i jordbruket

² Jf. forskrift av 15. januar 2003 om miljøplan

§ 8. Tilskot til drift av beitelag

Tilskot kan gjevast til drift av godkjente beitelag som organiserer felles beitebruk i utmark i minimum 5 veker i sommarhalvåret.

§ 10. Tilskot til skjøtsel av slåttemarker

Tilskot kan gjevast til føretak som skjøttar artsrike slåttemarker som er spesielt verdfulle for biologisk mangfald i kulturlandskapet. Det er ein føresetnad at føretaket har inngått og følgjer skjøtelsavtale utarbeidd av Fylkesmannen i Møre og Romsdal.

§ 11. Tilskot til skjøtsel av kystlynghei

Tilskotet kan gjevast til føretak som held ved like område med kystlynghei gjennom hald av sau som beiter ute heile året, og tek opp hovuddelen av næringstrongen frå beite. Det er ein føresetnad at dyreholdet er godkjent av Mattilsynet.

§ 12. Tilskot til tilrettelegging av fuglebiotopar

Det kan gjevast tilskot til tilrettelegging av hekkeplassar for utryddingstrua fugleartar, dersom det er inngått avtale med Fylkesmannen i Møre og Romsdal for vedkommande sesong.

§ 13. Tilskot til seterdrift med mjølkeproduksjon

Tilskot kan gjevast til føretak som har heile eller deler av mjølkeproduksjonen på seter i minst 5 veker i sommarhalvåret. Produksjonen må skje innafor kvote³, eller i samsvar med forskrift om fritak frå overproduksjonsavgift ved lokal foredling av mjølk.⁴ Det kan gjevast ekstra tilskot til føretak med seter, der råvarene frå setra blir foredla på setra.

§ 14. Tilskot til skjøtsel av gravminne

Tilskot kan gjevast til føretak som skjøttar automatisk freda gravminne på innmark. Gravminnet skal vere registrert i register godkjent av Fylkesmannen i Møre og Romsdal. Gravminnet skal ikkje vere sterkt skada eller øydelagt.

§ 15. Tilskot til ingen/utsett jordarbeiding

Tilskot kan gjevast til føretak som utset jordarbeiding av kornareal eller eittårig raigras til våren.

§ 16. Spreiing i vår-/vekstsesongen

Det kan gjevast tilskot til areal der det vert spreidd husdyrgjødsel tilsvarande minst 5 kg totalnitrogen per daa. Siste frist for all spreiding av husdyrgjødsel på føretaket er 10. august, og avlinga må haustast etterpå.

³ Jf. forskrift 7. januar 2003 nr. 14 om kvoteordningen for melk

⁴ Jf. forskrift 24. juni 2003 nr. 777 om fritak frå overproduksjonsavgift ved lokal foredling av melk

§ 17. Tilskot til bruk av tilførselsslanger

Dersom vilkåra i § 16 er oppfylt, kan det gjevast tilskot til areal der det vert spreidd husdyrgjødsel ved hjelp av tilførselsslanger i staden for tankvogn, tilsvarande minst 5 kg totalnitrogen per daa. Avlinga må haustast etterpå.

Kapittel III. Rettar, plikter, sanksjonar m.m.

§ 18. Kulturlandskapskrav

Føretak som tek i mot tilskot gjennom regionalt miljøprogram kan ikkje gjere inngrep i kulturlandskapet, utan at kommunen har gitt samtykke. Normal skjøtsel av eigedomen vert ikkje rekna som inngrep. For brot på denne føresegna gjeld § 21 om avkorting tilsvarande.

§ 19. Vedtak, dispensasjon og klage

Vedtak etter denne forskrifta vert fatta av kommunen. Fylkesmannen i Møre og Romsdal kan i særlege tilfelle gje dispensasjon frå reglane i denne forskrifta. Vedtak fatta av kommunen kan klagast⁵ til Fylkesmannen i Møre og Romsdal. Vedtak fatta av Fylkesmannen i Møre og Romsdal i første instans kan klagast til Statens landbruksforvaltning.

§ 20. Opplysningsplikt og kontroll

Føretak som søker om tilskot etter denne forskrifta har plikt til å gje alle nødvendige opplysningar som kommunen, Fylkesmannen i Møre og Romsdal eller Statens landbruksforvaltning krev, for å kunne behandle søknaden.

Kommunen, Fylkesmannen i Møre og Romsdal og Statens landbruksforvaltning fører kontroll med at utbetalinga av tilskot er rett, og skal ha tilgjenge til all bokføring, korrespondanse og dokumentasjon som gjeld tilskotet. Kontroll av opplysningar gitt i samband med søknad om tilskot kan også skje ved teljing av dyr og måling av areal på dei landbrukseidomane føretaket disponerer.

§ 21. Tilbakeholding og avkorting ved brot på forskrifta

Dersom føretaket har gitt feil opplysningar som kunne eller har ført til urettmessig utbetaling av tilskotet, kan heile eller deler av tilskotet holdast tilbake inntil forholdet er avklart. Dersom dei feilaktige opplysningane er gitt aktlaust eller forsettleg, kan heile eller deler av tilskotet avkortast

§ 22. Avkorting ved brot på anna regelverk

Dersom føretaket driv eller har drive verksemda si i strid med regelverk for jordbruksverksemd, kan heile eller deler av tilskotet haldast attende til forholdet er retta. Er det ved brot på slikt regelverk vist grov aktløyse eller forsett, kan tilskotet avkortast heilt eller delvis.

§ 23. Utrekning og innkrevjing av avkortingsbeløp m.m.

Differansen mellom utbetalt beløp og redusert tilskot som følgje av vedtak om avkorting etter §§ 21 og 22, kan krevjast tilbakebetalt frå mottakaren. Tilsvarande

⁵ Jf. lov av 10. februar 1967 om behandlingsmåten i forvaltningssaker (forvaltningsloven) kap. VI

gjeld der føretaket som følge av manglende oppfylning av vilkår i denne forskrifta eller av andre grunnar har motteke ei utbetaling som føretaket ikkje hadde rett til. Beløpet kan også motreknast i seinare utbetalingar etter denne forskrifta eller i seinare utbetalingar av tilskot til føretaket.

Der mottakaren ikkje var i aktsam god tru om utbetalinga, kan renter krevjast frå det tidspunktet då tilbakebetalingskravet kom fram til føretaket. Ved grov aktløyse eller forsett kan renter krevjast frå tidspunktet for utbetalinga av det urettmessige tilskotet. For renter gjeld elles lov 17. desember 1976 nr. 100 om forseinka betaling m.m. med tilhøyrande forskrifter.

§ 24. Iverksetjing

Forskrifta trer i kraft frå 1. juli 2013. Frå same tid blir forskrift 29. juni 2010 nr. 1019 om tilskot gjennom Regionalt miljøprogram for Møre og Romsdal oppheva.
